

吏部

漢員升補

欽定大清會典事例

卷七十至
七十一

欽定大清會典事例卷七十

吏部

漢員升補

通理前俸

停升

官員停升

分納試俸

即升推升

次序

科道內升外轉

捐

通理前俸 ○康熙三十九年

諭凡復職官員必果屬冤抑准復者通理前俸其餘一

概不准接算前俸 ○乾隆五年奏准內外官員除丁

憂裁汰告假補授後前任所食之俸並即升加

級紀錄均准通理隨帶外若緣事議處應降應

革遇有

恩詔免議。及督撫糾參革職提問。或公事註誤降革。後經本案審虛開復。或欽奉

特旨。以該員叅處之案。本屬冤抑。復還原職者。均准通理前俸。即升加級。卓薦紀錄等。亦准隨帶。其餘並非本案開復。以及業經緣事降革。奉

旨起用人員。原係曾經獲咎。棄瑕錄用。與本係冤抑開復者不同。一概不准通理前俸。即升加級。卓薦紀錄。均不准其隨帶。又品大之官。已經降級調補。後經復還原職補用。先降補任內所得即升加級。亦不准其隨帶。○七年覆准。向例革職

留任。降級留任。官員。開復後。其革職降級日期。仍接算俸次。但思革職留任官員。既例不食俸。其革職留任日期。自應不准算俸。至降級留任官員。仍照降級食俸。其開復後降級日期。均准一併較算。○二十年議定。部議降革。隨本奉旨。留任人員。俱准通理前俸。即升加級。卓薦紀錄。亦准隨帶。○五十一年奏准。革職官員。如奉特旨起用者。前任內所有降革留任。及叅罰案件。均帶於新任。○五十八年奏准。革職留任之翰詹

官。如欽奉

恩旨。准其食俸人員。照降級留任官員之例。通理俸次。一併接算。○嘉慶八年

諭。庶子王宗誠。汪滋畹。充當武英殿提調有年。辦理書籍五十餘種。妥協無誤。向來書成。並未得邀議敘。該二員因本年大考三等。降補今職。例不計算前俸。第念其在館年久。著加恩准其接算前俸。以示鼓勵。再開坊翰林。由大考降職者。聞舊例本按前俸接算。近年數次大考降補人員。均不准接算前俸。是以俸深各員。一經左遷。資格轉居最後。此例始自何年。因何更改之處。著吏部詳細查明具奏。欽此。遵

旨奏准。凡由翰詹大考降調者。查其現由何官任內降

調。即將此任內之俸。不論深淺。全行扣去。而以

現在應降之官。接算從前此官曾歷之俸。如少詹學

士。降為庶子。講讀。止准接從前庶子講讀所歷之俸。中贊降為編檢。止准接從前編檢之俸。

此內有從前升遷。本係越級。如由編檢即擢講

讀。而今降中贊。是中贊從前並無已歷之俸。則

但令接編檢之俸。餘俱照此辦理。其非由大考

降調者。仍不得援此為例。其滿缺翰詹。開列引

見等項。皆以一任俸比較。其升轉本不為遲。應仍照

舊辦理。○十一年奏准。月選論俸升轉。及部院

題升官員。如舊有降革等項事故。業經該部照例咨請開復。毋庸復俟。彙題奉

旨。始准升選。○十二年奏准。凡在京官員升授外任。

又經改補京職。以及部屬等官補放御史後。欽奉

特旨。仍以原官補用人員。除前任所得加級。已於升任時改為紀錄。仍准隨帶。其所歷前俸。不准通理接算。○又奏准。京外官員升任引

見奉

旨。仍回原任。或仍以原官補用者。亦不准計算前俸。

其升任未經引

見人員。有該督撫並該堂官奏明仍留本任者。所歷前俸。仍准通理。○十七年議准。各省候補人員。加捐分發。例歸捐班補用。不准接算前俸。如該員等前任內得有卓薦。並加級紀錄。叅罰等案。仍准隨帶。○道光十三年奏准。降調捐復人員。又經捐入開復。或議革後欽奉特旨起用。或降補他職。概不准通理前俸。○又奏准。保奏升用人員。升任引

見。仍以原官補用者。其保奏升案。不准隨帶。○又定。

即升。卓薦並各項勞績得有升案。仍不准其隨帶。均改加一級註冊。至降調補用官員。後奉

特旨復還原職者。前任並降補任。所得加級紀錄。亦不准隨帶。○同治七年定。呈請降歸原班人員。從前所得紀錄。一概不准隨帶。

官員停升。○順治十三年議准。在京官員任內。惟罰俸之案。不行停升。其別項叅處事故。均俟開復後再行升用。在外官員任內。凡有未完叅處罰俸事故。概行停升。○十五年議准。各官叅罰。皆據考功司移付文選司註冊。後經考功司

開復。移付文選司。若文內年月款項與原付註冊前件不符。即取考功司原稿校對。○十六年議准。官員被叅被訐。及因公註誤議處等事。考功司議覆未結。雙月擬升之時。文選司於十五日以前。將應升各官。現在有無議處。開單付查考功司。考功司於二十日查付。如考功司移付。註有現在議處字樣者。即停升轉。○康熙三年議准。內外大小官員。除移送停其升轉者停升外。其提問官員。不候事結。即停升轉。○又議准。每月二十日截限。截俸後。雖有咨送開復者。亦

不准升。○乾隆七年議准。月選官員。均於二十日截限。若官員議處之案。在二十日以後續到者。不行補付。亦不停升轉。其外官罰俸之案。各省所完解銀兩。均令每年按定四季呈報戶部。戶部亦按季查覈。於督撫咨到之日起。扣限二十日。轉咨到部。逐案查銷。即准其照常升轉。停其扣滿罰俸年限。至二十日截俸後。知照銀兩完解者。亦不准升。○三十七年議准。外省官員完繳罰俸銀兩。在戶部就近完繳者。以戶部移咨吏部銷案之日起。扣限一月。方准論俸升用。

仍以二十日截缺為限。如截缺之日未足一月之限。雖俸次應升。仍俟限滿後再行升用。○又定另記檔案改入民籍人員。如本身係現任官職。停其升轉外。如果係著有勞績。賢能出眾之員。在內許該堂官保題漢缺。在外准各該督撫具題請

旨。其原係旗缺者。出缺後不准再補。原係候補漢缺者。仍准補用漢缺。停其升轉。○四十八年

諭。向來滿漢官員人等家奴。在本主家服役三代。實在出力者。原有准其放出之例。此項人等。既經雇主放

出。作為旗民正身。亦未便絕其上進之階。但須明立章程。於錄用之中。仍令其有所限制。嗣後此等旗民家奴合例後。該家主放出者。滿洲則令該家主於本旗報明。咨部存案。漢人則令該家主於本籍地方官報明。咨部存案。經部覆准後。准其與平民一例應考出仕。但京官不得至京堂。外官不得至三品。以示限制。著為令。○五十年奏准。京外正佐各官。有親老迎養任所。獨子之親。年七十。衆子之親。年八十。京官停其升用。外缺。外官無論何項應升。概停升轉。統俟可以升用時。再行按班照例升用。○嘉

慶元年議定教職推升教職例不出省。雖有親老。仍行按班推升。○又議定原例內載考功司移付。註有現在議處字樣。即停升轉之語。改為考功司查明付覆。如有議處之案。即於本員名下註明。現因何事叅處。例應作何議結。以憑查覈。停升。其不候事結。即停其升轉之例。應行停止。○九年奏准。現任人員。如遇應升到班時。有因告病。終養。休致。揭帖於二十日以前到部。未奉科鈔者。除該員現任本缺。仍俟奉

旨到部後再行開選外。至其應升之缺。該員告病終

養休致揭帖業經到部。未便復行升用。應即扣

除。以其次合例之員擬升。○又奏准。八旗及漢

人家奴。實有勞績。服役已經三代。經伊主放出

為民者。旗人。取具本主甘結。加具參佐領圖結。

報部存案。民人。取具本主甘結。報明地方官。咨

部存案。俟放出三代後。所生子孫。方准出仕。京

官不得至京堂。外官不得至三品。如放出後未

經呈報。應俟補報之日起限。其八旗戶下帶地

投充莊頭。無論旗檔。是否有名。均不准其出仕。

○十二年奏准。京外正佐各官。有親老迎養任

所。其有曾經卓薦之員。無論獨子衆子。親年七
十八十以上。在外。准其本省以應升之缺。保題
升用。在內。准其以近省之缺。按班推升。○十七
年議定。凡獨子之親。年七十。衆子之親。年八十。
如有呈明親老告近者。俱准銓選。○道光四年
奏准。京外正佐各官。有親老迎養在署。得有卓
薦。及著有勞績。以應升之缺。升用後。因親年及
歲。聲明告近者。准其取具同城地方官印結。呈
明任所督撫。豫行咨部存案。即以該員任所近
省之缺推升。均毋庸再事行查。○十年議准。內

務府等衙門官員奉

特旨簡放各關監督。及各省織造等項差使。如任內曾經得有選用道府升案。屆輪選到班。應停其銓選。俟差竣後。再行按班銓選。○同治八年

諭。前因候選道白讓卿在浙江玉環廳任內有失守處分。奉旨飭查。尚未奏結。吏部不將該員扣選。於奏補漢黃德道缺時。又不隨摺聲明。恐承辦司員等另有情弊。當經降旨令該部明白回奏。茲據奏稱在任候選人員。挨選到班。如有處分行查該省。未據咨覆。例無扣選明文。其各項推升人員。有關處分。尚未定議。